

Dia cu Horcan a caba cu Aruba

DESPUES DI HORCAN

Sinta dilanti mi computer, scuchando na radio con un señora a keha cu ainda e no a haya yudanza, pa chupa awa rond di su cas, mi a cera wowo y pensa riba e dia cu horcan a caba cu Aruba, lagando decenas di morto y decenas di hende herida atras.

Aruba a haya bishita di e horcan mas intenso di su historia cu biontonan di 160 km pa ora.

Horcan Xina tabata e ciclon tropical clasico, cu a nace na Cabo Verde y cu a tuma varios dia pa cruza lama Atlantico pa yega Aruba. Den su prome dianan el a bira un depresion, yega te na forza di tormento tropical, y basa riba calculacionnan di satellite, el a bira un horcan minimo.

E avion di reconocimiento cu Merca a manda, a calcula cu e biontonan ta di 100 pa 115 miya pa ora, prome cu el a bin dal den e prome islanan caribense, pariba di Aruba.

Tres dia despues, ainda biniendo direccion di Aruba, su biontonan a crece pa 190 miya pa ora.

Dia 13 di Septober di año dos mil y pico, el a pasa Bonaire y Corsow cu 160 miya pa ora di biento y Aruba tabata sa cu tin un horcan di categoria 5 na caminda.

YEGADA DI HORCAN NA ARUBA

Pa 6 or atardi, Prome Ministro, den un transmision nacional, en cadena cu tur canal di television y radioemisora di Aruba, a anuncia:

"Esaki ta un alerta di emergencia.

Mi ta ripiti! Esaki ta un alerta di emergencia.

Den mas o menos un ora e biontonan di horcan Xina ta yega nos costa pariba.

Su wowo a move 4 grado zuidwest, locual ta indica cu su forza di mas grandi lo pasa directamente riba nos isla.

Tur habitante ta ser pidi pa keda paden y no sali.

Esnan cu ta den cercania di shelternan halto, y cu por yega cerca, bay eynan mes ora. Esaki ta un alerta di emergencia!"

No a dura mucho cu e biontonan a cuminsa wordo sinti tur caminda, y den poco menos di un ora Xina a cuminsa bati Aruba, cu tur su forza di un trein riba velocidad maximo.

E muraya horroroso di biento a cuminsa bati tur edificio explotando manera un bom.

Glas a bula tur rond, den tur cas y adeficio.

Muebles y aparatonan electrico a cuminsa bula di un lugar pa otro kibrando contra muraya.

E casnan a forza pa wanta biento, y esnan mas debil a perde muraya y basha den otro.

Daknan di cas y edificionan a wordo ranca manera papel di schrift, mientras cu e trein pisa a sigui su ruta.

E biontonan a saca zonido monotono, manera di un avion jet, sonando como si fuera ta chupa el a chupa tur hende.

Tur otro sonido a desaparece.

Tabata parce, cu un horcan combina cu temblor, a dal na mes momento.

Tur sorto di vehiculo y containernan tabata bula pafo, manera babuletnan buscando un bon flor of taki pa wanta curpa.

Palonan di coriente y tur mata tabata wordo ranca manera dratchinan di cabey.

Riba henter e isla muraya di edificionan y dak, tabata explota riba impacto di e biento combina cu awacero formal.

Esaki tabata djies e comienzo.

Na costa zuid y west di Aruba, lama a subi tera, drenta e isla te na dos kilometer, lagando lagonan atras di 2 pa 4 meter hundo.

Masha hopi cas a perde fundeshi y tabata parce cu ta un maremoto a pasa riba nan.

Shelternan a yena cu awa y decenas di hende tabata busca manera pa sali prome cu nan hoga den nan.

Mama y tatanan, cu yiunan den braza of riba lomba, tabata move cu dificultad buscando salida unda bentanan a spat for di otro.

Otronan tabata carga y yuda hendenan herida y e grandinan cu no por a move lihe, pa busca un lugar mas sigur.

Adultonan y mucha tabata para riba mesanan y stoelnan den scuridat, gritando pa nan familiarnan.

Adultonan cu a logra sali tabata busca manera pa evacua mucha y hendenan grandi pa nan wordo poni riba dak.

Den menos di un ora Horcan Xina a laga 90 % di edificio y careteranan, riba e isla destrui, den un puro demostracion di poder.

Ora cu hendenan cu a sobrevivi e "locomotora" aki por a sali por fin, a bin ripara cu henter e cara di nan isla a cambia.

Den e anochi scur, por a ripara ainda silhuetanan di casnan destrui y ta te su manise cu solo a cuminsa sali, a ripara e casnan sin fundeshi y otronan cla pa basha den otro.

Otro lugar unda tabata tin cas, ta solamente bloki, di aparente muraya di cas, por a mira aki aya, y un fundeshi sin nada riba dje.

Caya y camindanan, tabata yena cu muebles, material di daknan, bestianan morto, y unda tin e lagonan di awa, por a ripara cu cascabelnan y culebra boa tabata landa buscando algo pa lora curpa riba.

Por a ripara lisimbijn y scorpionnan morto, cacho, burico, porco, y galiñanan morto na cantidad, pasando nan dilanti den e olanan forma pa forza di rooinan cu a forma e lagonan.

Aki aya por a mira cadaver humano flotando, y adultonan balente tabata risca drenta awa pa rescata e curpanan pa prepara nan pa entiero despues.

Tur brug riba e isla a basha den otro, partinan di botonan y yachtman por a ser mira tira te un miya for di costa, riba tera.

Tur rond di e isla tabata haya cadaver di un of otro persona cu a bira victima.

A haya cadaver den edificionan, casnan destrui, vehiculonan, riba caya of den matanan, y otronan cu tabata flota den rooinan y e lagonan cu a ser forma.

Hopi a muri di atake di curazon despues di mira e destruccion of di mira cu nan cas a desaparece. Hopi a muri pasobra no por a yega hospital cu nan pa tratamiento di emergencia.

Familianan completo a perde nan bida na un manera mucho horroso pa describi.

Den dos dia, sin coriente, sin cuminda y sin awa, holor di morto a cuminsa yena e ambiente di devastacion masivo.

Aire tabata tin holor di carni putri unda cu a bira.

Centenares di hende a keda herida, un mas grave cu otro y hospital no por a atende nan tampoco pa falta di trahador, falta di material y falta di lugar, mirando cu grand parti di hospital moderno nobo a keda severamente dañá of destrui.

No por a opera y pa falta di coriente, hopi hende a muri ademas, pasobra no por a usa cierto equiponan pa scapa nan bida.

E isla a keda sin awa pa-bebe, sin coriente, ningun hende a keda cu placa pa por cumpra algo pasobra tur machine di placa a keda sea destrui, of for di operacion.

No por a move di un lugar di otro, pasobra no tabata tin caretera henter y unda ainda por a pasa, trafico tabata paraliza.

Centenares di auto a keda destrui of dañá.

No por haya gasoline ningun caminda pasobra tur pomp a keda cera, sea pa motibo di daño of destruccion completo na e edificio y daknan.

E isla a conoce tristeza y dolor.

No tabata tin Corsow, ni Bonaire, ni Hulanda, ni Venezuela pa yuda mes ora.

Tur a sufri di e awacero y di e biontonan di horcan.

No tabata tin comunicacion cu mundo pafo pasobra tur instalacion di Setar NV a keda destrui of cu daño inmenso.

Ta un man yen di radio amateur cu a scapa nan equipo y cu uso di generador y bateria a logra un of otro contacto den exterior pa auxilio.

Mientras tanto sangura a invadi e isla, cuminda a putri cerca esnan cu a logra scapa algo y hopi cu tres pa cuater dia sin cuminda a come esaki tambe. Otronan a bebe awa contaminada.

Hendenan cu tabata tuma cierto remedinan a keda sin nan remedi y a bira mas grave, sin cu nan por a haya yudanza.

E temperatura halto di e isla a haci hopi hende malo ademas di malesanan, y no tabata tin aireacondicionado tampoco.

Hopi hende a bira masha malo debi di infeccionnan di heridanan sin cu nan tabata tin vacuna di tetano contra esaki. E heridanan post-horcan tabata critico.

Yudanza a cuminsa drenta poco poco, despues di un siman di sufrimento y morto.

A dura seis luna prome cu Aruba a cuminsa biba atrobe, y añanan largo prome cu e isla a cuminsa para back riba su pia, manera e tabata na September 2004.

Aki mi a habri mi wowo, y realiza cu mi a pega soña y tabata soña di horcan Xina cu Dios spaar nos isla, pa nunca experiencia algo asina.

Juby Naar.